

Contamento di storia cerca nos grandinan cu Philomena Wong



ORANJESTAD (AAN): Pa di cuater aña consecutivo Biblioteca Nacional Aruba ta niba su proyecto di contamento di cuenta pa nos grandinan. E biaha aki autornan participante ta Sra Philomena Wong y Sr. Frank Williams y contador di cuenta Señora Amarilys Velazquez. Diferente presentacion ta planea pa tuma lugar na e diferente casnan di Anciano na Aruba. E proyecto tin un duracion di tres luna.

Dos bibliotecaria di Biblioteca Nacional Aruba hunto cu e poeta/autora local Señora Philomena Wong a bishita Cas Marie awemainta. Señora Wong ta presenta su poesia titula "Placa, placa, placa". Declamacion di e poesia ta di Señora Maritza Petrocchi. Señora Wong hunto cu Sra Maritza Petrocchi a yega di presenta e obra aki tambe den un Cafe Literario durante Lura Cultural di Biblioteca Nacional Aruba. Un presentacion impresionante, presenta cu hopi pasion y dedicacion

Philomena Wong
Philomena Wong, un poeta bon conoci a nace dia 22 di December 1941 na Aruba. El a traha na Aruba como maestra y despues como cabesante di un school basico pa hopi aña. Tambe el a traha na FAVI como "intinerant teacher" di muchanan visualmente incapasita. Mas cu trinta aña pasa el a cuminsa skirbi. Su debut tabata na aña 1970 den e revista "Watapana". El a yega di publica diferente obra di poesia (Por ehempel: "Mi ta biba den mi pensamiento" 1983 y "Na caminda pa independecia" 1986 y tambe "Di ta...pa...tabata, 1992). Philomena ta skirbi cuentanan cortico tambe.

Ademas di a publica den "Watapana", Señora Wong a yega di publica den "Di Nos" di Pierre Lauffer na 1971, den "Cosecha Arubiano" na 1983 y den "School y Komunitat" na 1985 y 1986. Goza un tiki Tin musica tambe pa diverti e publico riba programa.

Despues di e autor tin presentacion di Grupo musical Goza un tiki y nan repertorio ta consisti di 12 cantica. Canticanan clasico cu nos tur conoce. Nan a canta canticanan manera "Potpuri di Tumba" y "Chanita". E grupo a worde forma door di empleadonan di biblioteca y coleganan di Archivo y ICA cu BID, cantantenan ta Vanessa Boekhoudt, Seraja Engelbrecht, Glenda Maduro, Astrid Gietel y Yosmar Sneek.

Cada siman ta bishita un cas. E presentacion ta dura mas o menos un ora. Meta di e proyecto aki ta pa yuda tene e habitantenan di e casnan socialmente activo y pa haci promocion di lesamento. E bunita proyecto aki a bira posibel cu co-financiamiento di UNOCA y Biblioteca Nacional Aruba ta gradici UNOCA pa esaki.